

夜

雨

秋

燈

錄

夜雨秋燈錄卷六

天長宣 鼎癭梅甫著

太容第一洞天

温州鎮署極雄傑有孫鎮軍頗儒雅甫莅任修葺堂皇階下掘得古劍爲明季戚大將軍守溫時故物劍鐫七星文戚名字年月日甚詳公素好奇益搜羅時金石僧六舟居幕府瞰堂下古井云中有磚甃探琢爲硯不減香姜公信之託言潛井實所以爲硯材也詎吉招人役架輶驢水竭無敢入公懸賞格募壯士繩索持炬下云有急卽搖鈴人倚玉虎俯瞰井底黑如漆燈光熒熒如豆燦可知也里有貧民張小六胆素壯又涎募資厚應召時方盛暑着羊皮短衣入炊許井上人忽聞鈴聲曳索起視之張小六杳矣大驚再繩索呼其名不應守終日竟無耗而泉

亦不遽湧再以巨燭下照昏不能辨有無張之母號哭來云只此一子是必飽潛蛟腹公遣諭其母云若爾子真烏有當養爾老其母聞之愈慟通城士女爭來窺訊喧喧十數日忽其子自隣郡歸笑可掬且衣有奇香若蘭爾公召入問何之曰某初下井時視鐵底大可容十笏鑿洞七急以木屑敗絮塞泉淵持炬四照則東壁有大石門封鏤如鑄門首有額石刻篆文某曾讀書識字因門高不能辨風突起門霽然闢其中別有洞天殿閣嵯峨欄柵紆曲庭前有大樹如水晶開花如紫玉某正潛晚忽樹後來美人數輩古粧束見某微笑且耳語某迷惑遽踰石扉入纔十餘步門遽闔大慙泣叩美人求援救彼嘆曰此何處能容爾來去作梁上燕耶雖然當引見主者旋見重關洞啓高捲珠簾有美男子袞冕裳衣秉着珪坐堂上美人入咨白卽傳呼

某伏階下自報名叩數百下衣黃美人捧簿籍上衣素美人接
略繙閱呈主者面霽若喜詢某從何來白潞井由主者方有所
諭忽衣紫美人入報曰天符至主者迂一紗帽絳衣貴人進手
捧橫木丹書若畫蚓焚香拜謁祇領訖貴人辭出宣令施行美
人咸更軟甲佩劍手齋瓶噓盞盞古樸目所未覩甲士隨入咸
金兜黎鎖子甲手執兵刃戈戟銛利如霜夾侍主者出升輦端
坐覆以珠翠纓絡金寶蓋輦左侍力士輦右侍美人各十數輩
猶寬綽某尾伏輦角力士怒欲加鞭笞美人緩頰始免須臾雲
霧騰起兩龍馭輦行倫睨下方如大海心驚色遽變主者睨某
笑倏至一大山頂有白衣老叟引極大牛車上列木桶數十大
如五担甕執鞭伏道左聽指揮傳諭前驅輦行更遠叟忽報曰
到矣牛車首忽下垂入江尾忽仰豷接輦層疊如山如雲梯叟

停車携牛浴江中翻騰激浪如踴山岳如盪星辰變鞭一揚則牛回顧吐水入木桶如瀑布之挂嶺如匹練之橫天鞭一抑則又滾入江視鞭揚抑爲吞吐如舞之應節奏如戰之遵號令奇觀也心計木桶將滿疾雷果大震耳爲瞽視車輦均騰空際若過往狀忽雷又奇震心胆裂若昏瞶比甦則身已隨隣郡曠野中雨霽曬濕衣乞食村郭問人聞某衣上杳詢告所以爭延之家具觴飲贈資斧始生迴耳公聞之益驚喜欲窮其異仍遣張導人再入則石門猶在堅不可開額鐫篆文曰太容第一洞天古碑嵌壁亦不可鑿出寶塔如來像無字蹟遂燃火烘水痕以紙墨楊額與碑文出而呈於公公大喜揭於衙齋補入金石文字明日泉大至愈清澈公厚恤張小六詢其爲人無他異惟事母至孝出於天性云衣上香者蓋誤沾龍涎耳里人呼曰孝

子香張六

懷儂氏曰在昔熟開舜完廩授以島工之衣始騰寥廓浚井授以龍工之衣始出幽深香張六一介窮民耳應募而來何得神授卒能來去自如生還故里夫然後知上至九天而不墜下入九泉而無礙者惟忠臣孝子則可

禿髮張

粵賊之踞蘇松也境內焚掠殆盡村郭皆墟其需用皆以重資取給於江北於是賣賊食者踵相接而肩爲摩郵之時堡漁人張姓土猾也鬻髮鬻髮人呼爲禿髮張云其妻蔡姬尤陰狠夫婦操舟撒網陰以阿堵賄津要得公行於大江南北接濟賊不一年家頓饒裕購田疇築宅舍漸成富家翁而貪醖愈熾素與東隣薛有隙以其狀控於宰禿重賂宰反以薛誣而與以杖薛

啣之深伺之嚴禿罔覺也日弄潮走江上肆無忌時京口有喬姓女娼也本淮安產幼孤鬻於鵝母喬以爲錢樹子身材嬌小有殊色人爭暱之呼之曰小喬山西賈周某暱尤甚而情尤久囊橐垂罄猶戀戀不能去鵝雖白眼女獨善視之女生一子周種也遂名曰阿周年四歲宛轉得人憐而周病且劇女日夜侍湯藥哭失聲剗臂肉以進卒無效彌留時執女手泣曰卿情厚矣雖結髮恐未必若是失路人無家可歸無地可瘞數根枯骸骨火之棄之惟卿便所念念不忘者阿周一點血吾後也卿善撫之吾曰暱女泣曰諾周死卽命阿周服喪明年賊大至女負兒扶母將以投江北適有漁舟離江滸百步外夫婦皆倚櫂瞠目視女呼之曰乞帶逃難人登彼岸不吝值也奈女心雖急而渠意甚閒嘒嘒計孔方多寡方問答間而賊騎盡至漁人遽刺

船去賊下騎斬鵝脅女與兒而去送姑蘇賊酋僞王某一見大
悅意殺兒而留其母女大痛叩階有聲曰妾僅此子耳兒生妾
亦生大王愛妾當兼愛兒否則寧死不從也女淚睫盈盈若秋
水嬌啼嚶嚶如曉鶯酋意亦良不忍出家姬遍與女較皆不及
遂納女爲僞妃以阿周爲僞世子女善修飾工語言僞王惑暱
殊甚而女之夢魂時繞於江淮雲樹間苦無隙可遁耳禿髮張
適又繼舟蘇城下蔡姬時携鮮魚入城遍遊各館暨各僞署藉
售私聞女美而富遂貨絲入僞俯求見引之後堂見女南面坐
左右侍兒皆珠翠滿頭羅綺被體屏息無稍倦嫗稽首拜極力
獻諂容不似江上索資惡態女聞其口操江北音問嫗子江北
人乎曰然曰翌日來有要事浼汝言已賞金帛甚厚嫗再拜出
明日果又來卽有心腹婢引之曲室見女跌坐繡榻極威重而

兩睫盈盈有淚痕旋命嫗坐賜茶果問嫗之家門居址甚悉具告之女益唏噓嫗乘間附耳問曰娘子在此荷王寵尙不安樂耶女搖手令禁聲婢出瞰闔外無一人然後垂泣曰我亦江北人也被擄後雖得王憐其難堪處有娼妓所不忍爲者王又性多疑醉後時於紅燭下露白刃此心惴惴常不憚我何難一死爲膝下小嬌生故隱忍至今若輩終非好相識且勢亦必敗我母子未知何所歸言已漣涕不已淡黃衫袖盡濕嫗慰之曰娘子勿悲老身却有盜緝手段特恐娘子非真心欲逸耳女以天日誓嫗曰我有小舟在城下遇風順逸何難耶但娘子家已破矣赤手走江北母子何以爲生我家又赤貧不能供爾母子坐食是亦可慮女曰實告阿姆王積資數萬金筦鑰皆我掌握但運若干出過江卽與汝瓜分何愁無饗殮計嫗曰善計遂定由

是運出珍珠四升白銀百錠黃金十斤女又以繡金小黃旗與
嫗曰以此刺舟入水關但云真人覓以游內河可無禁耳蓋賊
中呼僞命婦爲真人也蘇城本有河環繞蔡果刺船入卽繫之
僞府後門河岸下一日酋奉僞命赴松江行時女置酒與餞訂
歸期致珍重王大樂不爲疑酋去阿周時戲於舟次女一日午
後飲各婢以酒皆沉醉然後徧體裹金葉重重珠玉無算呼嫗
運出錦繡十餘包急更良家衣飾焉登舟以賊符賺出水關日
夜行適風帆如箭不兩日已出京口江矣是時水波不興江天
如畫金焦歷歷在目其心甚怡惟禿與嫗時作耳語瑣細不可
辨心又疑慮而無如何惟優兒枯坐以待忽聽京口呼聲甚厲
推篷瞰之則賊船如蟻集如蜂攢鋒刃如林立船首賊大呼曰
婆子快留下真人免汝死蓋賊黨知僞妃遁必嫗挈無疑一路

追至也禿與嫗聞警無所措時風力又弱乃夫婦極力搖櫓且搖且怒女曰我輩無辜爲汝母子將畢命刀下矣汝心安乎汝還不投江死將何待耶女痛哭跪舟中曰誠有累汝夫婦倘得生還金帛皆歸汝吾母子乞食不怒也禿怒催死不少緩女又泣曰若追近吾自入水無相累惟願汝夫婦行陰陽帶吾子過江北周家一塊肉不可棄也禿大聲曰死則死耳誰與汝喋喋說家常耶女抱兒哭淚下成血而禿逼益甚幸賊見舟遠瓜洲壁壘鉦鼓不絕不敢追遽轉舵禿舟將抵岸又遲滯不進遽泊蘆洲中將女身所帶金珠全取下隻身推上岸曰容汝餓斃不淹斃卽老公陰德矣女猶哀哭而禿舟已遠女四顧茫茫知是絕路加之青蘆白葦水鳥哀鳴心益酸痛哭不成聲無已饑啄蘆芽渴飲泥汁賴是數日不得死一日巡舟聞隱隱有婦女哭

聲蹤跡至大駭見其襪纒憔悴滿面泥沙幾如鬼物問何來以實對乃慨與乾餼贈以百錢引之坦途俾乞食自去抵維揚得遇隣媼某氏憐而留之慰月餘漸光澤因流媼偕之時堡尋阿周消息當禿之回堡也擁厚資立地成巨富正苦無兒卽以阿周作螟蛉志甚得也比女至泥首階下云我之得生究賴賢夫婦前事均已惟求將阿周賜還禿故作錯愕狀大詫曰此誰家女郎素無一面緣將何處尋汝兒女以蘇事實禿撫掌大詫曰據汝言汝賊婦也若首之官當得上賞尙詐尋汝子耶女四邊環矚竟不見阿周而禿又狡賴立呼莊奴逐女與媼出而扁其扉女仰天大哭曰吾千辛萬苦爲恐負故人託耳今已矣何生爲言已卽攫身將投溪水媼急止之曰妮子痴耶江北有官長管轄盜往愬愬不直再死未晚也乃相將控於宰禿又賂當道

邑紳果以無証不理其先禿見女至藏阿周甚密頃見女去防
漸疎一日兒行隴畔薛見之誘入已室與以菓餌問云好孩子
依親娘樂依假父樂耶曰願依親娘薛曰善卽藏兒不使出時
女正具狀泣訴於漕督某公而薛又送兒來投案母子交訴薛
亦力証發前案督怒立飭麾下弁率壯士百人星夜往時堡捕
禿禿村居正以失兒不樂一夜又夢與嫗登最高巖俯瞰下有
一舟一橋風日甚美少頃大風怒吼雪墮如掌忽又霹靂驟降
遂與嫗驚墮巖下醒甚惡之是夜正剪燈煮酒與嫗述夢中事
忽搜者到門呼聲震耳火光如晝嫗出黑索已在頸上禿怖踰
牆將遁見涼月昏黃中有巨鬼頭與簷齊伸巨掌如箕撲之使
墮遂就縛有司來將家財一一封誌而去禿到案尙狡施極刑
始服夫婦駢斬之督以半財與女俾撫孤當督之判斷時禿大

呼云民間殺人者死今喬氏尙生阿周亦在何故得斷頭罪督笑曰卽私賣賊食四字已死有餘辜尙不足消受一斬字耶臨刑之際觀者如堵五花僧子惡其髮短戲以絁爲籠加其顛秃仰天歎曰行年五十尙不能保首領今而後知窮人暴富禍也非福也

懷儂氏曰平心而論禿髮張貪財太過而卒未曾斃一命何遽擬大辟特江上舡船逼女就死數語毋乃太忍太毒禿之死死於忍且毒也吾願世之生有財癖子智自雄而毫無惻隱者當以禿奴爲戒此癸酉歲冬余船凍高郵之三槩聞張海仙所述如此

陸季真

明季功名重資格科第出世家往往草野中賢哲士爲貧賤阻

階進良可歎。江左布衣陸季真者，其父應變業農爲里役，竄名報充催租隸。兩肢有杖瘡，季真幼嗜讀，通經史，雖不得應童子試，而躬耕時輒携一卷自隨。偶聞父將應比，卽奔至縣衙伏地代受笞歸。仍雜誦無戚容。一日又代比，宰見其意氣慷慨，驚詢曰：「若何人？」耶曰：「里正固儒生也，婉陳所以磊落從容，毫無乞憐狀。宰試其文，援筆立就，遂慰勉除其役。且游揚於學使前，學使訪得實，欲補季真以博士弟子。辭不受，泣曰：「奈何借老父棒澆博進取耶？」其父聞之亦泣曰：「爲父貧，不肖累吾兒矣。」季反含笑慰之曰：「兄本不願仕進耳，讀書所以明性理化氣質，若以之作敲門磚，非真能讀書者。」父始破涕爲笑。幼娶石氏，亦美而賢。事翁姑能內助。季真南北學貿易家，漸康久之，購田畝設市廛，不復走湖海而名益彰。一時名士多樂與之遊。石氏坐操勞病不

育季三十無子恆鬱鬱里有單孝廉蓉塘盛治園亭日延賓客
鴈聚嘯詠慕季真工草書古篆亦每每折簡苦邀致季欲辭卻
而其父獨勗之往俾結納焉顧孝廉性輕薄好訕謗有驚蜘蛛
之目同遊者又復阿附吮舐助成誹笑會季偶醉正色曰季
真聞古語云俗語近市織語近娼諺語近優鳥之美羽勾喙者
鳥畏之魚之侈口垂涎者魚畏之人之利口辨辭者人畏之士
君子酬酢晉接寧不使人喜而使人畏乎孝廉雅人當不以鄙
言爲河漢也衆聞之咸愕顧孝廉獨悚然謝過而心中竟不能
無介介矣燭見跋季真辭踏月自返途遇惡少年夜獵回獲禽
甚夥毛羽肥壯者豎馬背纖細者挂戈杪鴈犬歡欣笑語叢雜
季駐足略凝睇聞籠中一狐尙活呼曰陸先生救我驚詢獵咸
云是物通靈隱南山石人洞時臨水次照影愁歎擊輒逸去今

日酣臥鴈鵠欄大石上乘不意故生擒來先生問之得毋欲買而補裘乎曰然酬以十金放之去孤奔竄突無跡季煢煢歸時覺衣帶上甚重入室中甫篝燈卽有一物墮地視之乃美丈夫也衣帽鮮明拜伏在地曰先生長者拯我殘生從今納草銜環報之有日耳季毫不畏懼引入就座徐問蹤跡自云陝產胡姓名天玉隱此百餘年大丹已成今日之厄乃數所定過此無碍矣季愛其風雅卽以爲友登堂朝父歡若通家月夕花晨輒與之訂詩酒互賡唱焉胡勸季學吐納長生之術季笑曰僕所願不及此問何願曰功名子嗣耳曰時未至也是年秋爲季父七十壽辰季謀於胡僅擬開家宴匿不告桑梓胡曰不可諺云人生七十古來稀君年來田有穫學有名夫婦伉儷正當經營逐珠履捧瑤觴爲椿庭介眉壽奈何草草學田家子至屋宇陳設

酒筵甘旨僕早已代籌之屆期胡皇皇往來果如所說布置熨貼門庭一新更爲廣致秋菊一千餘種飛舞燦爛競美爭妍中堂堆菊山兩壁排菊屏空庭成菊海縷絲蟠菊燈酌水釀菊酒內外旣叢籓溷亦列鉅觀也越日衆名士爭來祝嘏其實爲看花啖嚙耳季一一遜謝殷欵留衆把酒獻詩腐俗敷衍至孝廉獨揮毫濡墨大書一額云天保正逢聯云鼻祖定茶神無怪殊榮邀杖國頭銜書菊隱正拈好句怕催租衆賞其工穩切合而季則面赭頰申默無一言蓋額嵌保正二字首聯嵌杖字次聯更明用催租二字客散胡收菊連還原所季對之唏噓流涕曰僕自問生平無一得罪鄉里奈何文人戲謔動輒訾吾父子短處今日之舉是求榮反辱也胡笑曰得毋爲單孝廉聯額語乎曰然曰近今風氣以刻薄爲能以譏刺爲業飛短流長反黑

爲白造無爲有矧高堂少賤鄉里咸知卽日對之三揖九頓猶不能禁其不侮而君且爲之進藥石下針砭是更速其侮也雖然僕當與之惡作劇使彼亦少受侮人之侮何如時單於背山臨水處築一小榭泉石極幽落成後招衆飲季真亦與焉狎客某繪園圖某作園記囑季代繕而不容署欸惡其賤也工藏衆正傳觀忽如雪如銀之素壁現墨畫一圓樹木亭臺景物官曲亭內一石榻榻上一美女子裸體仰臥一俊男子蹲而淫之女張股迎湊眉目動流衆詳睨之大驚蓋女爲孝廉女男爲孝廉僮也錯愕問而西壁又現一圖屋內銀燈明滅床上男子酣眠一女子潛起挑燈一幼男隔帷立而淫之女背榻悄聽意態甚濃睨更驚蓋女爲孝廉妾童爲孝廉子牀上臥者卽孝廉也面目逼真的可指認衆惟駭詫而孝廉竟面色灰死蓋實有其事

從無人知者疑園中近有狐向空詈甚毒聞梁際大笑曰單蓉塘汝亦知道破醜處難堪乎不自改悔猶然狂吠乎若意猶未足當畫之通衢使行道者得飽觀而四揚也汝家中葬事何止於此汝曾盜嫂汝妹有私約汝妻亦私奔謂他人不知靈我亦不知耶再詈當一一畫出方已衆信爲狐代哀之不許孝廉自哀之亦不許至長詭謝罪始許再顧壁則景物全無烟雲盡掃矣少頃孝廉入衆不知何意惟銜杯以待聞梁際悄語曰諸君尙不去耶單蓉塘已歸而投繯氣止一縷若淹滯恐霎時受訟累言已果聞宅內喧嚷云孝廉羞憤持刀欲殺妻妾不可得旋自縊賴婢救始免衆奔入略慰藉而後逃去季歸雖略抒憤懣然究惡其太過擬俟其來加誚讓而胡由是竟絕跡半年忽跋而來驚詢之則淚泫泫墮曰今而後方知戲無寸益而有大批

也單家之事園神告吾師師卽遣童子飛索繫僕去鞭八百追去金丹囚之甕穴幾不能與故人相見頃得逸出尙有瑣事奉求問若何曰煉丹頗費歲時稍懈卽有墮落君若爲僕廣陰德虔懺悔則珠還可望耳言已引季之女墻西畔掘地尺許得窖藏計千金曰明年必疫疢君爲我合藥濟衆功德甚高但藥裏面須註明陸某代胡天玉敬送方妙歸更開方置硯下諄囑而別後果驗鄉里賴之活萬人爭詢胡天玉伊誰季惟笑不答顧金尙有餘更自典水田足成之設育嬰堂棲嫗所數年無間而家道益豐惟弄璋無期終不足以慰老父一日風雨晝冥雷震所居季正侍父燕坐驚幾仆突有一毛物鑽榻下聲啾啾啼不輟而電光出入數匝始震聲亦遂寂欲問胡而胡不復來偶乞友人扶轡召仙決惑誼大書曰兒胡天玉也年來功德已達上

蒼帝已準兒投胎翁家百日後卽降生矣日昨雷雨乃雷火燒
兒尾痛極狂呼不必駭怪生時自有人來爲兒錫名字可留之
餐湯餅再叩寂然時石已孕屆時果產一兒頂圓額方的爲英
物然墮地後啼不已未謫何故忽一老道士方袍朱履翩跹在
門不及通司闕者卽岸然入向季略舉手便索公子一審視抱
兒出道士親爲摩頂袖出一紅丸如豆大塞兒口中祝曰胡天
玉爲吾徒索我金丹啼呱呱名曰仙轉字曰丹壺富貴壽考體
如此忠厚之報有是夫祝已兒竟不啼懷兒遽奔出且走且言
曰居士要此兒何用不若仍與老道爲徒季大驚急隨逐視道
士行如飛頃刻已出村門奔大道不禁大呼曰妖道何攫吾孀
兒道士亦言曰居士絕不邀我啖湯餅能白作巫醫耶且此兒
長大必獨有意見不能紹弓冶留之誠無益耳言訖奔更遠夕

陽在山人影忽杳季大哭獨回家中男婦奔集以爲顛詳告之
衆笑曰公子正熟眠何曾爲道士攫去季入闕視之已就其母
乳如故也門之啼笑目灼灼視季若欲有言戲呼曰爾胡天玉
耶爾師送丹還汝且賜名仙轉汝知之耶兒呀呀又若欲笑知
其有宿慧愛之同掌珍其祖更終日含飴抱孫爲樂兒長最穎
悟目下十行後因闕獻亂全家逃深山中尙終日把卷不廢讀
時單孝廉亦挈卷來季惡之然亦無如何忽聞言賊大隊至季
登樓見賊如風雨蔓延山谷旋搜得孝廉全家挈之上馬季恐
入已宅正惶急無謀突穴際一道士墮以闊袖障門烟霞繚繞
賊視雲中立一金色天王佩劍像羅拜不敢入僅携單之全家
西去再視道士杳矣知爲仙轉師焚香叩禱感謝莫名至 聖
朝仙轉已十四入邑庠廿一登黃甲出爲浙之大方伯是時祖

壽九十餘父壽五十餘均健飯受賈恩每遇單家狎客有漏網者猶週恤之酒後掀髯輒自述當日爲里正事

懷農氏曰醴泉無源芝草無根出身微賤而置身顯要者古今來豈少也哉何物孝廉動輒譏刺是恐其不盡發籍特殷殷勸駕耳知者感之愚者仇之狐之報正狐之愚也乃師方平之鞭施之允當

巫仙

巫之一教流傳已久曰端工曰香火曰童子名雖不一總不外乎鄉讎之遺意古之巫也僅僅逐疫禱禦早潦近則愈幻愈奇擊腰鼓吹畫角口吐秦腔弟子鳴鉦相和跳舞若狂更有搭臺演戲若優伶瞑目過陰若亡者鄉愚不知其謬每秋萬寶告成後輒斬豕爲羊延若輩來跳神數晝夜不爲倦丁男子婦環坐

聽唱九郎官水母娘娘各故事然後飽啖神胙不醉無歸雖有
賢宰官之嚴禁而其風究莫能革也然吾聞諸父老云昔有巫
仙則不可同日語矣巫仙姓金名鼎齊人父故母矢志不再醮
遺腹生巫家赤貧紡績度日巫五歲面白皙若女子偶過村館
聞書聲琅琅羨之歸卽嬌啼求讀母勉送就館村學究愛其資
穎不較修脯至九歲卽完一經母泣曰兒能讀吾心樂也然一
寒至此能日日抱本頭而不急謀生活乎巫亦泣願遵母教隣
有王翁老巫也欣然願授以巫母命從之學巫年餘卽能歌舞
侑神觀者稱羨凡邀翁者必兼邀巫翁亦時分値與巫巫奉母
且潛懷供果餌母富家賢之恆預蓄珍味以贈久之母目盲不
能織全賴巫之孝養焉然業巫者俗例年甫冠卽請師過關其
法於村落結壇遍集同道散神三四日以利刃仰口樁橫木上

其師禁以符咒引徒赤足立刃口兩村氓抬之遊鄉里然後得專任賽神事是猶儒之遊泮僧道之具足也其師憐巫無資慨然代爲謀過關日巫驚逸衆巫持叉捕得巫堅臥不敢行師盛氣叱之巫泣曰父母遺體敢蹈不測乎師曰吾有法在曰若然須吾母來諭我行否則抵死不遵也衆果扶盲母至始涕泣挽登戰栗無人色久之始已由此得值供菽水稍餘卽分酬王翁暇則舌舐母之盲瞳漸有光母不能寐夜坐床頭唱巫曲博母歡偶思鮮味雖百里必蹶竭往明年巫年十八矣母忽病劇巫日夜侍湯藥私剗臂上肉以進無效母若知之謂巫曰兒無大自苦吾數盡得與兒父聚地下足矣惟兒坐貧困無婦未免遺九泉恨至天明母忽告巫曰兒父果來招我矣一笑遂逝巫號泣欲以身殉其師來監守得不死且醺資爲營葬焉巫遂願

側出必告返必面事死如事生也不數年其師又病劇巫刳右
臂肉以進亦無效師知之曰噫汝何愚乎人生死有數也夜深
師之子姪輩咸垂首眠師啓枕箱出一函示巫曰此吾少時得
之繁無間山中也上皆巫咸真訣非豚犬所能習吾憐汝誠始
授汝當臻無上乘巫拜受置入懷袖帥中夜斃巫哀毀盡禮如
喪已親顧年已二十有二猶獨居歌朝雉風雨一室燈火三更
時披覽其書凡禽遁勅勅諸術數無不瞭然洞臻玄妙隣有奔
女每却不納路有遺金曾棄不拾巫之聞譽遂達於鄉里矣時
有邑紳奚元華乃觀察御史退老林泉者極愛巫之誠篤穎敏
飄勸曰以爾質若改業無不成何泥於硯壘自汚乎可先爲我
司會計當徐圖爲爾授家室巫謝曰某之業雖賤乃師所授母
所命也今師亡母故若遽棄其業則於師爲不義於母爲不孝

敢乎哉奚公語爲之塞一日有蒼頭控兩衛來云湖邊某第邀
酌神以道遠辭蒼頭笑出白鏹二錠鏹然擲几上曰以此爲訂
事歲尙豐酬也隣艷羨咸勸駕巫不得已託隣看門戶自荷神
軸法器潛懷師授遺書策術隨去抵湖畔舍騎登舟刺入水雲
深處遙遙數十里蘆葦蕭疎水禽嘔嘔茫茫萬餘頃忽蒲葦中
現一螺墩圍聚數家茅屋竹籬四圍皆水許多健兒貌赴赴臨
水眺望問曰來乎曰來遂登岸入門視屋宇深邃樹木杌枒堂
上以戈矛爲陳設意防備宵小不爲怪須臾主人出則一五十
餘歲男子衣帽華麗如富家兒虬鬚碧眼氣宇魁吾視之凜凜
而言語溫和不見人輒笑與巫略舉手笑謂曰慕君法力遣迎玉
趾毋乃遠勞巫遜謝問作何道場曰敝村宛在中央一年安靜
乞爲祀水伯謝神麻也曰諾言次飲膳雜陳味極豐美夜宿床

榻襪被亦極安詳明晨盥沐面圍結壇咒鉢生蓮花十分嬌艷
空盎取濁醪如涓涓流泉盈盎乃止招鶴舞庭際拘蛇蟠燭花
上作種種幻相然後唱逆神曲聲情激越觀者罔不欣賞主人
更忤躍是晚親送之臥所衽何趾旋呼兩女子爲巫展衾拂褥
卽命伴宿巫力却而主人已去戶反扃矣視兩女子一年甫及
笄一髮尙垂髫均婉麗妍妙遺之不去亦無如何拚秉燭聽更
漏女子請解屣登榻問可否茗飲均不答枯坐如泥塑聞二女
私議曰是人真鐵石漢如此丰姿奈何至此處真可憐生也巫
心驚究不敢詰久之頽倦和衣臥二女絮絮語良久卽來偃倚
曰妾等奉主人命侍君寢若不蒙君愛則獲罪戾非淺巫笑曰
主人賢則賢矣然從無此待客之禮且巫所以事神者也夕狎
牀第晨詣壇禱神不幾睡而却走乎卿等宜遠嫌毋溷我寢兩

女忽淚隨如綆嚶嚶細泣低聲曰君固端士妾等亦非淫奔然所以自荐者亦良有故特不敢言耳巫知有異研詰再三女曰君以主人爲何如人乎曰不知附耳曰主人大盜也匿此作巢穴覬覦走江湖竊羽百餘人案卷百牛腰妾等皆自遠方掠來肩於內室幸彼天闊毫無汚玷然所嗜太奇喜食牝甘問何爲牝甘女頰暈久之曰渠以大瘰塞入婦女陰中匝日鉗出飽啖以爲甘又好合心臆問何爲心臆曰渠誘得少年來遣女子伴宿事訖則男子心花必開三四度則心花大放臨殺時沃以冷水然後剖而取食臆如哀梨大嚼以爲美妾等乃到此第一次差遣恐又垂涎於君之心矣問祀神何故曰彼每年盜劫四方逢秋必招巫謝神佑恐巫洩其謀故賽已卽殺巫祭神且生取其心下酒巫聞之驚駭無所措兩女亦伏叩求拯曰妾等見君

端巖必有後福始敢冒死以秘密相告洩則彼此皆慘死如蒙
救出牢籠當生生世世銜結報大德倘不以爲陋妾等願效英
皇同侍箕帚間姓氏則年及笄者金陵杜氏秋鵠髮垂髻者京
口俞氏螺娘均有父母兄弟久無耗秋螺素本姨表姊妹行巫
思良久喜曰生矣吾翌晨演法卿等預艷粧聽我吹海螺當作
顛狀奔出吾自以法携之去二女驚喜叩謝旣而勸寢巫曰身
處虎穴龍潭尙敢玷人清白乎曰非也渠性最疑凡此之爲恐
女子洩其謀故晨起必就男女診脉若心脉如故死更速巫曰
然則奈何曰與君一席話褻辭盡吐義亦不能另適君如有大
婦願備妾媵以終巫猶以爲不可女曰彼此求生尙能守腐局
耶巫無如何願共枕臥以示有汚女曰可入衾偃抱膚膩如脂
巫本童男至此竟難自持然兩女固猶處子也枕上互盟倦臥

忘曉朦朦間覺有人揭帳呼起曰美哉高唐之遊樂乎驚視之
主人也急起申謝果診其脈喜溢劍眉饒涎已流吻角外尺許
巫雖心懼而面不改色盥櫛畢云吉時已屆將迎水神向主人
索蘆箔一張葦柴三莖送門外飄水上問何用曰神舟耳旋即
披髮被彩衣執笏舞蹈忽貌如魔女忽狀作先鋒或翹足舞商
羊或仗地虎跳且鳴鳴吹螺作獅子吼二女果艷粧狂笑奔出
叉手斜睇對舞類顛主人欲驅返巫曰止頃刻神須兩女子作
前驅神貌猙獰他恐畏怖若二人昨與吾宿已暗書符貼背上
故聞聲自出也言已搖鈴畫劍兩女亦翩跹舞不已巫遽喝曰
咄爾神女耶曰然爾神女將軍耶曰然曰河伯吾自迎之河伯
夫人汝迎之遵吾令否則劍下死二女聲諾巫卽擊其左右手
作旋風舞且舞且歌金鼓大震忽聳身東望曰神至矣衆咸掉

首巫乘間挈兩女驚躍登席如箭離弦激浪衝波頃刻去遠衆始知巫以術遁急放船逐雙槳如飛將及巫使女携手圍坐已則折葦柴寸寸斷每擲寸葦則盜船遇之卽一巨堤亘水面繞越甫過巫又擲則又遇一堤如初比堤盡而巫已攜女不知何處去矣盜惟譁噪悔恨而返巫登彼岸欲覓代步返所居女急止之曰郎遁渠能甘心耶恐今宵卽遣人詣宅刺殺郎耳妾二人預蓄黃白物附腰際且遁跡他處俟彼伏誅再出未遲巫恐曰四壁蕭蕭毫無所戀惟二老寡道今夕無人作伴耳曰郎痴矣豈觸禍爲孝抑避禍爲孝耶巫聞之許可然茫茫無去就不得已潛視秘書內有師驗云金郎金郎折蘆渡江克死者再獲美者雙望東急竄有馬無韁漁家艇子大好潛藏巫閱畢心雖服師能先知然語究費解忽見來時兩術齒草徐至鞍轡已失

巫解帶繫鎖嚼授二女共乘一衛已又乘一衛姑向東行蓋蒼頭竊得遠方兩衛至此換船以爲湖曲無人故任其自散牧巫適相逢顧免跋涉轉過岡阜突見平疇疎林中隱有極大村落花木繁蔚晚炊有烟一叟倚仗柴扉督農秋穫詳視之卽邑紳奚公元華也蓋村爲奚之別墅見巫急呼問下騎喘息詳告所以問二女何來又述顛末奚公大喜以爲純孝之報欣然邀入指廳事東廡曰以此爲賢伉儷下榻處且置酒壓驚視廳事懸額題曰仿漁艇屋巫心喜言驗可再生矣二女就廡休息農人婦來伺餐眠公與巫正夜酌欸叙忽聞叩門聲甚厲門隙瞰之燈火燭天刀矛森樹人皆錦帕纏首巫以爲盜偵至大驚幾喪胆告奚曰請公早縛某出無相累也公曰鼠子敢爾仗劍登門樓下問伊誰應曰公之舊雨不識耶程鎮軍夜巡湖哨順路訪

侍御公撫掌曰高軒下顧幾驚煞老夫開門延迓互作軒渠程風儀俊爽語操南音問巫何人公對以金孝子業巫并縷述遇盜一節程大歎異忽二女自廡內窺程久之大哭奔出異之蓋均爲程之中表妹也自遇盜掠兩家骨肉疊以書來求代物色頃遇直陳推功於巫曰妹等已委身事金郎矣程曰金郎純孝神人共欽所以履險如夷未可概以巫論卽乞奚公執柯成此眷屬奚呼巫拜謝程答拜再詢盜數路巡情形縷告之至天明始分不數日兩家父母果接程鎮軍書自江南來識壻而去遺奩資甚豐程亦旋領舟師夜至賊巢手縛渠魁盡殲餘孽竄遁淹溺不計其數盜遂平巫始携二女拜辭奚公回已敝廬至則一椽煨燼鄉舍蕭條鄰云奇事自君曩隨若人去不數日卽有許多惡寇索君甚急遍搜無蹤始火君宅而君又月餘不歸真

疑慮莫釋也巫見某道無恙卽欣喜引二女謁某然後出資建
華屋購良田居然康阜不復業巫然每遇旱潦疫癘猶欣然應
募奚公止之巫笑曰此某之素業也邑有大事敢推諉乎程鎮
軍言於邑令給匾旌其廬且免其役巫村居猶嗜讀凡堪天輿
地吐納導引之書無不博覽二女善居積甃新絲羅新穀以及
茶笋竹木之屬預蓄無不利僭徒數年富已鉅萬秋生二子伯
曰慰慈仲曰念慈螺生季子曰孝慈皆俊邁延師課讀俱有聲
庠序次秋慰慈登賢書女喜謂巫曰夫婦作合於盜賊中蓋有
天緣也人貴知止願爲諸兒娶婦諉以家政姊妹隨卽修長生
可乎曰善明年慰慈更出鄰省官司馬有政聲三婦亦極承順
巫夫婦均年逾不惑猶如二十許人長齋繡佛足不出門偶出
掃墓里人猶呼之曰金端工金香火金童子必應之曰諾毫無

封翁驕態顧螺娘性喜聞家事巫一日問螺曰卿往來僕僕不
畏煩耶秋曰有妾終日伴郎坐蒲團也可謂香潔道伴何必雙
雙苦厮守巫歎曰唉莽蕩軟紅塵終有撒手日來處來仍當去
處去耳尙有要事未了其速作一勞永逸之舉秋鴻喻其旨卽
日出千金爲老母建貞坊又出千金恤其師王翁後且以千金
恤鄰里貧者事畢齋沐遍辭鄰里云夫婦朝南海小夫婦泣留
之不聽駕車携秋螺隨一僕一婢去後遂不返

悞僕氏曰巫者蠱也蠱惑鄉愚終其身不過充泥塑之館供呵
旁之羹將於何更享令名得佳麗邀褒封耶巫中金郎每對人
曰吾業雖賤吾母所命吾師所授也孺慕真忱積久彌固冠裳
中且不可多得况區區一巫乎觀其婚嫁事畢携手雲霄曾不
少作眷戀是必天上仙真暫時謫降者也

十八鶴來堂

國初秦郵夏翁爲九二公後忘其名居鄉圭璧其身金玉其行力行善事甚夥不可更僕數更不能以常理測然家益富建造第宅時廳事上梁翁冠服拜喜神方衆親友吉服環侍待禮成申賀工人斧丁丁爆竹大震鼓樂甚喧突雲際飛一鶴至素衣元裳朱頂綠距翱翔審顧集正梁上引吭一鳴衆鶴隨至數之十八棧題幾滿望之如畫圖直待工師事竣衆向翁揖鶴遽銜接飛起鳴聲鏘鏘向湖天空闊處去秦郵向不產鶴亦異事也遂以十八鶴名其堂術者卜之以爲翁之子孫當出十八翰苑學士後果符其說目前夏變坡先生兩放大主考置身清顯與吾叔同歲生卽翁之耳孫也計入木天冰署者數僅八九而探芹食餼者更指不勝屈後嗣之昌猶未艾也余曾避亂居鹽城

偶晤海濱富室夏姓其昆玉溫文爾雅卓犖不羣功名僅博士
弟子員而阿堵物竟勝於秦郵夏見所携行橐上書五鹿至堂
異而詢之曰秦郵吾族也吾祖好善任俠就窳穽時突有五鹿
呦呦來環穴視葬畢而後去因以名堂海濱雖產鹿皆鯢魚所
化大如驢是鹿獨小如麋性猶馴善真理之不可解者噫奇矣
本是同根一秦郵一海濱均以行善獲報一來十八鶴一至五
鹿一貴一富何其不侔而合與秦郵夏翁事已載各家果報錄
中而海濱鹿至之事未傳故記之

玉牌殉葬

東河總督栗恭勤公諱毓英山西渾源人住東河純以拋磚爲
急務往來河干十數年輿內必置一機磚至今利溥人爭念之
相傳公少孤且貧而頭角嶄崎英姿勃發邑有富室某翁通儒

也一見公白袷衣有補綴痕大詫曰司馬長卿非終於貧賤者
邀至家中授以舉子業令與愛子同臥起燈火伴讀翁有女年
與公相若才貌雙全艷名噪戚里翁面許之居數年合卺有日
一夕與翁子將寢門已扃忽聞窗外有飛鳥翔集聲旋又不聞
心甚懼兩皆展轉不成寐翁子曰與君易榻或安寢公不忍拂
卽如其言少頃翁子輒聲起而公猶不寐忽又聞飛鳥聲正欲
問訊翁子已大號而死栗起呼衆人視室牖如故門闔未開翁
子已腹破血流衾枕羣疑栗栗亦莫能辨翁痛子甚鳴於官官
亦不能窮主名惟見公沉靜溫雅知曾參必非殺人者遂繫公
於獄姑作疑案先是邑人王姓雄於財亦翁門下士嘗求婚於
翁翁曰我已相攸得人矣却其請至是又復以爲請翁不得已
始娶之婚年餘頗伉儷生一子眉目如畫夫婦均愛憐翁終以

痛子之慘死詣上臺再鳴冤狀訪某粗暴性成卽以公擬抵斬
 有日矣王偶與女坐綠窗并兒爲笑王忽睨兒歎曰唉爲此一
 塊肉費我多少心思女聞其言有因固詰之曰卿已爲我婦言
 亦不妨卿知爾弟誰殺耶曰渠某曰非也我因翁却婚之恨出
 重資募捷盜殺渠不意快中今渠將伏法願償得此子特憐卿
 弟不能無戚戚耳卿幸勿洩女聽之殊自若翌晨粧竟託歸寧
 抱兒遽詣宰官署拾磚塊鳴鼓大聲呼冤官出女號泣述王語
 官大駭捕王出渠於獄王至一訊而伏女顧公曰女子宜貞靜
 雖死不能出閨闔今之拋頭露面者爲君冤非妾莫雪耳王賊
 之忍情同盜劫不得爲妾之夫言已倒提兒擲階石上曰妾不
 能爲仇人生子視兒已腦漿迸裂死矣又顧公曰妾已失身匪
 類不能事君君宜自愛他日奮志青雲卽所以慰泉下薄命人

矣言畢抽懷中小匕首遽自刎死官隸莫不慟歎公痛哭幾失聲由是力學成進士位顯要終不忘女虛正室得良玉一方潔白無纖瑕募玉人雕成小木主式一面鐫某氏小像一面刻端楷曰烈女某氏之靈左注曰受恩粟某泣誌工竣時夜夢女來冉冉下拜曰深情已達夜臺然玉牌幸一刻莫離也公出入俱繫衣襟上如烈魂所囑公任東河曾又夢入一古剎殿上塑三帥像中則修髯古衣冠左則白髭野人服右則平頂尖靴一品補服帥以絹蒙面旋有羽士出公問長髯帥曰謝大王問白髭者曰黃大王問蒙面者羽士不答第云公千萬莫到馮官屯去公醒甚惡之遂立戒不履其處是年適星使來深以屯爲河流要害先至屯堅請公議公不得已忽忽乘輿往時正暑晤星使三四語卽頭眩呼病急回舍館病已劇召一武弁入見公偃坐

椅上舌強不能語公以右手握弁左指已身弁會意云爲公更衣耶公頷之啓視行篋僅帶一紗補褂來公又指襟上玉牌弁云此玉爲公殉耶公連頷三四面有笑顏似賞其通達目旋暝以天暖卽在工次入殮竟以平頂尖靴而去始知兩夢皆預定也後千餘年水決中州汴梁城已岌岌官民男婦伏雉堞大呼乞帝焉見一金甲神擁怒潮東下呼曰快拋磚可免如其言霎時水退四五尺得安堵至今東河時現栗色小蛇官員伏地拜曰如恭勤公乞登冠頂果躍登冠須臾不見此聞之鄒君所述者或采之各家記載合爲一傳俾女之烈公之義并垂不朽

懷僕氏曰恭勤惠政澤民莫不仰爲河嶽爲日星矣騎鯨天上爲神宜也被冤瑣事何足爲公奇然某氏身已悞適乃萬難表白之冤卒能殺已成仁脫公冶於縲紲奇烈哉而公亦義報之

身雖不能同穴玉已與之同棺某氏有靈當破涕爲笑矣

鄧龍君

瓊州薩摩島在南海中島民數百家皆鯨人蛋戶之流蔡氏有
好女年三十尙守雌人有聘爲婦者合盞夕輒有金甲神以利
錐鑿其腦曰牧豬奴敢犯神媼新郎顛墳起如益魄攝亂若痴
無已仍送之歸以故雌處予人預以媼呼之媼綠鬢雲垂冰肌
雪艷觀者忘其爲海濱產一日漂衣水次有紫衣少年鼓棹來
青氈凝注細意殷勤曰好女郎惜不寡而寡也媼投杵含怒去
島民交詈曰個男兒不怕死其忒利天王子耶少年飄舟登岸
揖而訊其事慨然曰某正鰥也虛空之厲何怯於衷自篷底取
肴酒來曰乞執柯先享是又袖中摸金珠出曰許委禽再享是
民曰可耳可耳奔告於媼之父母見其裙履翩翩年尙少於媼

意頗愛憐惟碍神警因邀之至家拜手稽首執禮甚恭自陳赤道以南人鄧姓名無耳行四四郎從人呼也幼失怙恃海嘯捲所居馮夷指引許詣中區求鳳朝雉之歌乞恕孟浪也二老曰嘻桑榆暮矣旣乏佳兒理招半子然神明之責前車之鑑不能不惴惴耳四郎搖手頗自詡島民相攸者利其酬又試其勇所以慙羶之良殷二老云果爾身亦何樂有無夫之愛女翌果下玉鏡臺甥館旣成盛服入贅蘭若翡翠無此新鮮民觀玉潤旣豐且危及夜午銀釭背照互解羅帶竟無恙也伉儷甚篤郎不呼妻而曰姊嫗不呼夫而曰弟綠窻靜對毫毫不異人惟暇則繞室行不定登山哭失聲嫗詢云何則書空咄咄者又夜坐不呼舉燭午炊不倩采薪吐口中大赤珠懸室則明燐物則蕪人以爲海客伎倆已耳由是連船載珍奇與碧眼賈交易家遂康彌

年二老先後逝耶哀毀盡禮服除嫗生子墮地啼隆隆如蒲牢
耶舉之曰孽也棄之袖出短劍削其一耳曰此割所以誌也活
塞海岸上嫗悲啼覺腹猶震動須臾又生一子則默無聲息耶
抱出浴於海始加文褌擲嫗懷洒涕曰是方郊之兒也好乳哺
勿戚戚僕請從此去幸勉加餐飯勿苦念冀祐傷神魂也因而
泣下詢何往曰僕父生時任俠充捕有吳公子爲孽主命往緝
爲其所賺傷目死母哀痛以身殉吳且圖僕賴鮑姑挈之走漢
臯始偷生今有子矣行當窮黃泉碧落不復仇誓不還也嫗泣
曰妾誠不敢以私情損大義乞弟命兒名而後去曰兒誕合年
月日時皆辰可名曰辰仲言畢整衣拜別携短劍遽刺來時船
飄然去矣然從此室無燈則闇釜無炬則冰蓋珠亦隨身寶也
先是十年前聞郡某鄉有槐井里居民亦類薩摩之繁里之智

井上生老槐根輪囷蓋井口腹空虛露巨穴夏日田家夜坐納涼見燈光如百十琉璃球蛇行魚貫自穴出冉冉上矗藻銀漢移時始墮如水銀瀉如瀑布垂其聲颯然仍投入穴見者屢矣村自是雞種絕人亦多病腦裂死僉知井底物爲厲然究莫得其主名新秋來一叟一嫗均斑白一童亦倜儻與村人問訊自願捕妖物問物何名曰吳公子也請自隣村購家禽百頭爲餌叟嫗各負長劍兒戴巨石上有字若蚘伏草際無聲息伺兩夕光現啖雞有聲噴羽如飛雪飲血若奔泉腹果蠕蠕將反兒已投石阻穴若泥封物躍起挾黑霧遁叟嫗并出大呼化神龍龍與之戰物吐霧龍吐珠攻擊有聲兒亦化小虬助戰物敗北追之是地也距魯之某郡三千餘里郡城敵樓敗儲火藥庫是日咸見風霆吼震屋瓦皆飛陰雲忽燃濕燄作炬有黑物長五丈

餘者鑽入庫一龍繼至怒吐火苗如金蛇者亦射入庫藥鼎起
力掀山岳響徹重泉龍目當其鋒首且痛八擲銜皮石出三十
里外創劬之血成小河哀號之呼達遠墅一龍挾黑雲如幕如
領者三四階始捧創龍騰起而黑物早潛出似逐空中小虬子
宛有女道士挾虬子逸物始反翔是異也由閩至魯直頃刻也
吳公子者蜈蚣也受創之龍四郎父也救創龍者四郎母也虬
者四郎也女道士鮑姑也四郎之與媼別卽圖報是仇也槐井
里人當夜仍見燈光宛轉進穴去若無事者然始知非常物神
龍且不勝田畯又奚圖遂一全徙樂土里爲墟矣十餘年有褐
衣人狀極猙獰往告里人曰我吳公子也潛槐井久矣近有獨
耳兒掘地海之水灌我兒狡獪不成禽水洶湧不易遏老夫卜
驚遷汝輩可珠還也臨去又太息云老夫無他過惟曾浴天河

數次爲河鼓所劾終恐爲若輩昇然吾計殺鄧龍君夫婦死已
晚矣言已不見媼自四郎出見漸成童師教之讀極慧夏日浴
於海不返媼哭之慟明日含笑捧兩石版而歸怒詢何往曰兒
浴忽有巨爪搏兒入水底謫之童也左缺一耳貌與兒同呼兒
曰弟引至一大山石洞中榻上跌坐一把劍少年童跪白三四
語兒亦跪童命兒呼之爲父父云此汝兄曾相識乎兒云嘗聞
母述兄生時卽削耳瘞今尙在乎曰渠龍也故賺之來汝人也
故留之哺吾與汝兄同煉劍丸於此將爲汝祖父母報仇仇往
依海州朱道人汝兄化作樵者往說道人下逐客令仇窮促秋
日將甘心於汝母子故招汝來與以符籙自衛屆時我與汝兄
來援言已命兄負兒瞑目行甫啓眸則已在家門首呈符則亦
石上刊篆若蚓者分佩之月餘東隣來一荷鋤畬夫問何能曰

能墜畝且開渠一人之力日可百餘丈西隣來一籠雞牧豎問
何能曰善豢雞一雞兩卵一卵四雛雛再卵卵再雛一本萬殊
矣島人俱笑其妄然言辭豪邁辰仲樂與之遊因登堂拜媪盻
呼曰姊牧呼曰娘媪怒畜之懷而怪牧之親畜云某年與媪將
理以女兄事媪牧云兒自幼依父以活不得不弟仲而母媪也
且孤寡可憐仇家視同機上肉多聯假姻婭不亦善乎媪唯唯
惟含怒以謝翌午畜牧沽桑落與仲飲仲因時寄感扣缶作歌
曰秋氣烈秋聲悲仇未復父不歸天闕無路兮呼將伯而莫余
違恐覆巢無完卵兮身有翼而不飛歌畢洩瀾媪聞之益洒涕
曰懵懵哉兒也娘心若割尙肆新聲耶畜牧亦投袂而起和以
鮑姑所製刺促行歌曰天有道地有竅鬼車啼仇將到歌已一
莽道士闖焉在門媪挾仲逸從窗隙窺道士巨目門月痾背彎

弓唇邊露雙牙若鉗遍體排小劍如篋厲聲呼曰取鄧氏母子
餘速走避毋櫻劍鋒也畜牧含笑詢與鄧氏何隙而虐其犢獨
道士語塞問畜伊誰畜仰天大哭繼而大笑曰嘻適從何來遽
集於此實告爾僕卽鄧氏遺孤四郎也道士怒吼劍未及出四
郎已揮鋤成劍九擲空際門未決化牧之辰伯急取籠中雞拍
羽咒曰彌躡彌星乎星速飛鳴毋消停助吾父誅蟲精雞應聲
騰入碧雲引吭一號離離啾啾可裂金石旋側超下擊擊道士
頂四郎呼着着辰伯呼者者霹靂忽烈而真形現毒軀僵乃一
極大蜈蚣如魯人所見者雲中伸無數雞爪爭裂蟲革攫取其
珠不可以數計餘革紛紛棄地下陰囊遽掃六合泰如母子奔
出叩拜仰視空中雞大如九苞鳳刷羽整修翮四郎金冠繡服
旁立負劍之童子則辰伯爲辰伯所識而母不識者含淚珍重

叱雲遽升母子既蹙大仇之能雪又悔畜牧之幻而迷於物色也其蟲皮黑於漆粗於鬚爪鉤棘若鋏骨節中尙有小珠零星乃收珠而焚革郡牧古春月因薩摩爲其所轄遣使索珠靳不與衡之會明年夏赤旱石爍沙煎苗如黃髮迎蛇師搓鮓答諷木郎禱雨之術窮牧告民曰汝曹知前代有曝巫與尅者乎乃飛符縛媼伸至置露頂晒烈日中島民聚百人焚香哭於牧署之門曰使君虐神媼恐貽吾小民憂牧軒渠曰世人咸知愛妻子惟龍君亦然渠若救糟糠吾得因之賺雨澤是誠爲汝曹乞命豈得已哉揮手使去媼伸長號數聲赤雲團團縷縷白日邊下嚕咄之鳥隨有千羽闐然粹至有紅絲一線縛母子入雲去再視媼居則數椽煨燼而珠終不可得云至今海濱尙有祀神媼救雨澤者

慎儂氏曰龍神物也芒兮笏兮無堅不摧彼蠹蠹一蟲竟賺之使喪明而殞軀而失耦何其奇哉孝子如我四郎亦復匿跡銷聲者廿餘年而恨始洩何其難哉古春月鄙且毒虐四郎妻子如兒戲曩使勃然一怒官閣遭焚額爛頭焦亦可禿食殘之魄胡計不出此僅僅乎紅雲一朵天外飛來尋故劍以騰霄攫明珠而入掌亦何其懦哉噫此其所以爲龍也

翟仙石

浙醫翟君有石癖游山谷得瑩潤玲瓏者輒袖之歸几席皆滿更有兩卵石朝夕佩帶未嘗須臾離自云仙產故以仙石爲子當其遊都門也有會稽某官農部郎中夏病疫幾殆妾隨病均服翟藥愈酬以資不受新秋翟忽忽整歸裝將出都詣農部辭農部手出一函面泐吾弟紫霞髓道人手啓九字卽云僕無以

報先生惟吾弟自幼學仙於會稽某山間洞天深邃圓峭壁
扞之無門闕痕下有雙槐對峙如龍如鳳者是也然僕有隱謁
三四語對壁一念石門卽開乃吾弟入山時所暗囑者偈云天
門不開地門不開白雲何處金銀臺哥哥有字來石門開仙門
開先生長者幸勿洩恐駭物聽耳僕以此函煩先生作殷洪喬
或可窮洞天之闕先生其勿辭乎曰幸甚回浙勾當家事畢聞
土人云果有是山但深僻少人蹤翟卽裹糧徒步窮數日之力
始達其處入山愈深則景愈幽攀藤羅履虎豹山花習習作幽
香羣見峭壁插空冷翠欲滴白雲往來雙槐宛在翟肅衣冠拾
地下小石塊扣壁且扣且念偈語霽然一聲雙扇洞開有童子
孺然至前問客何處來曰是汝家大郎寄書人耳童導之入囑
立樹下先登堂傳客語翟環視洞中有池沼臺榭有泉石花草

不過如人家園圃狀惟好鳥爭鳴風日和美碧桃繡毬諸花時
正破萼則纔如人間二三月也少頃主人出逐客戴鵲冠朱衣
鳬舄握麈尾風致洒然顧年甫二十餘而道氣溢於眉宇翟升
堂與之揖主人亦揖就坐翟袖出書與之主人立而受曰勞鄉
人遠步心甚悚仄然緣亦大矣今夕吾師挈客來夜飲君亦可
藉贈道範耳翟視其堂上陳設皆塵俗所罕見尤奇者中懸畫
幅乃工筆畫一赤身美女子四圍環繞雲氣半隱半露女子執
金簪齟齬笑殊骨突然亦不敢問童子旋以茗碗二進客一溫
一涼翟舍涼飲溫童意似惜卽以涼者奉主人命代飲跪拜受
之甚恭須臾涼月上堂上然樺燭如白晝一童子奔白曰師至
矣主人起再拜立中庭果見空中墮一叟長髯偉軀面頰削後
隨二客一壯一幼皆古衣冠岸然而至見翟遽卻步告以家兄

寄信來者始就座略寒暄卽珍饈羅列芳香襲人上設一席叟與壯者客下設一席幼者與主人也旁設一席翟也翟席餽饌猶人世間物惟味極甘美酒則一溫一涼如進茗狀翟終有隱疾不敢飲涼者暍溫者少許卽芳冽無比而主客所餐多有平生絕不認識者主人起以巨甌酌酒跪進爲叟壽旋近翟小語云鄉人到此不易須旣醉旣飽而後歸毋覲覲作客態翟唯唯然主客清談妙緒紛如不可思議翟貪吟仙論幾忘卻杯中物也遠鐘動月漸沉叟掀髯而起曰諸君尙能泥飲乎衆曰敢不如命乃命一童子以竹簪四插入地中主客各吸一簪略略有聲吸已客興辭主人送之庭前井畔叟與二客皆跳入井主人三揖而後返問翟曰醉飽乎曰謹領矣曰回書容自寄天色將曉請鄉人卽去無少留言已一揖送客翟怏怏隨童子出見庭

下卵石鋪地月光照之皆覺可人潛懷其一比出門一回顧則童已杳矣晨光澹冶中捫石壁依舊天衣無縫悵悵覓路歸一日卽抵所居初不似前番入山之難出石視之潔白如玉光潤非常且有天然文理作一書一畫一面畫嫩綠柳枝上棲杜鵑鳥殘月一鉤昏黃浮動一面金色篆文曰叫月子規喉舌冷七字分兩行驚喜欲絕旣又悔在洞中何不多取數枚可以炫俗目明年以事入都足力甚健千里不煩車馬往見農部已歡躍而出曰先生信人也幸不浮沉數行字然先生作賊不怕仙人齒冷耶曰無之曰舍弟信來已明言之矣卵石一枚有之乎乃大惶恐曰姑與君戲耳舍弟信中備言先生純篤惜無仙根然一席晚餐已可延上壽渠旣愛石何不取成對者去留一取一何其廉也今寄來第二石煩轉致翟君言已袖出一石大小果

與已石無二一面帶野花一叢一蝶斜掩蕊底一蝶側臥花鬚
栩栩欲活一面篆曰宿花蝴蝶夢魂香也翟受之愈狂喜再拜
曰仙人惠我無涯矣農部云山中奇石甚夥外人有仙緣或可
得一二枚若寄致家人卽遣山神彈劾問復函如何來曰或白
鶴或鸚鵡卽至卽飛去耳問令弟仙師有名字否農部笑而不
答翟後漸洩謁語於浙人好事者尋至其處偶一扣念石門亦
開童子望望卽抽身返門闔如故今則雙槐猶在山中樵覽尙
能指其處云此余在兗州聞幕賓張吉人所述如此蓋明季嘉
靖時事也

懷儂氏曰昔人曾先後得石二上畫杜老詩意二句一曰石出
倒聽楓葉下一曰櫓搖背指菊花開字畫皆佳天然紋理是亦
人間所或有不必仙人洞天而後有者而世人竟不敢以一

石之微私貽家中豈仙人之廉與抑山神之刻與問諸石君石亦無語

離魂墳

隨之李生橫塘少孤貧煢煢顧影三家村授蒙爲生而性好布施每憾力綿里有孟全真本真人法官因誤施勅勒逐出江西者生計日窮時來村中瓢叫生憐之分口食以飫孟不言謝忽一日告生曰方外人將蟬蛻矣意以腐濁累子問何時曰卽在今日生覩其鬚髮飄飄神旺體強不深信出守囊錢沽村醪與飲孟把酒甚豪至日晡忽擲杯案頭曰限到矣應聲斃身不仆面帶笑然體則冰村人勸招村夫舁棄叢莽生不可曰朋友死於我殯敢負所託乎預醺修羊得五金買櫬具瘞高岡事藏生勸遠遊念舍館走四方爲人傭書得值更游輦轂地米珠薪桂

長安豈易久居而秉性狷介不妄干人日缺褻殮饑驅無計茫
茫之通衢遇同里聶芝仙舊相識遽呼之生竟耳不聞目不見
急曳其袖則喘汗將脫聶謫生窮促曰子其饑乎急偕入飯肆
餐以薄餽而後進甘美始漸能語神意轉悲聶曰君旣到此尙
不作依人計乎生以無門對聶小語曰秋閑有日矣宰輔劉公
有子正物色名倩子若結納僕爲介紹可乎曰諾明日聶果誇
生於公子曰此人中鳳也非敢浪作曹邱當敦禮厚聘毋草草
却高人公子信之一見卽訂交引見尊甫更垂青生遂於宰府
下陳楊不復窮途哭阮囊矣旋近大比劉公治觴款生酒闌掀
髯一笑曰措大亦知老夫折節下交之意乎曰招賢禮士正宰
相之要道惜某駑劣負長者耳曰非也犬子不才恐墮弓冶意
屈大手筆爲吾兒作捉刀人生以荒蕪遜謝曰子迂矣第能逾

抹滿幅免作秦碑則量無不售者何憂爲閑前一日公授生以
關節二日子分嵌文內準許一矢貫雙雕入閑適與公子聯號
左則魯之歐陽生鏡明生刻意營三作嵌關節題破吻合無痕
殷勤與公子已則草草塗鴉羞如所贈仍擬携關節之一出已
而夢神告曰歐陽孝子也何不以棄者與之醒遂贈歐視其文
平更稍代潤澤之二三場均比隣遂訂車笠而出榜發三人均
捷明春又同捷南宮生一人入木天公子與歐均授部曹劉之
同官者咸知生鯁又覩風采爭與論婚生商於劉公云世態何
可笑人也太史公未第時誰肯下眼覩僕有猶女名曰婉婉貌
如其名年甫及笄願卽奉爲箕帚詎吉人贊視婉婉果慧美伉
儷莫名生日依丈人居亦絕不計及俸之薄而職之清惟劉公
性疑忌喜隔戶牖聽私語暗布臧獲偵後言惡介近譏詭僻出

人意表雖家庭骨肉亦終日如泥塑坦腹異姓更難疎虞晨起
遣幹僕送之冰署夕歸飭內侍引入甥館求歸不許遠遊莫容
無妄交一人無妄行一步公治婚後反作羈囚雖至契如歐陽
亦不能常晤生頗不耐然究以恩遇致青雲未敢言也每於枕
上竊竊不平婉勸之曰耶既登仕版敢作卵石抗乎且小住俟
蹈隙再遁始獲萬全妾多病恐不能育子尙擬住臨邛爲耶覓
茂陵女生聞之稍慰劉謬談八股外惟好着棋公子聞新來一
雲遊道士工此技招致之主賓甚歡道士寡言語無干求更得
劉意生偶自內出瞰之道士非他孟也笑貌聲音無一或爽見
生故點首微笑回憶曩事莫測於懷一日乘閒謂生曰李先生
貴爲蔡中郎矣尙憶故人平生曰公其生耶孟急搖手示勿語
小語云僕乃尸解羽化前非真死慎勿洩於人恐驚若輩駭聞

也生告以所苦孟笑曰此有數在奈何雖然當爲子謀翌日又竊告道士仰天捧腹曰子何不棄軒冕而遁邱園乎生云新婦情厚不忍棄道士旋仰天良久俯首良久攜仆生於楊又挈之起飄飄踰牆出共坐竹杖上囑閉目耳際風鳴頃刻千里杖旋落則墮河南紫陽東鄉山中仙剎隆起爲砢礧道觀孟拉生入有老女冠出迎揖之入孟曰此李太史也乞假福地養疴暇卽任肆游覽慎毋慢客女冠諾引之寮房几榻明潔出眺林木景物幽森生躍然自喜以爲謝經楷出牢籠矣孟曰尙早尙早言已欲別問何之曰君家泰山尙有半局未決勝負耳生乞潛申於婉曰少卽相晤何必倩殷洪飄然去生伊蒲餐後忽倦入藉榻眠又豁然醒覺身畔有佳人偃倚視之婉婉也見生醒悄問曰郎倦耶抑病耶何遽傾跌昏不知人頃自廳事昇回幾驚然

妾也生起與婉晚餐夜抱婉眠甫交曉又身在觀中聽晨雞唱
女冠起唱步虛聲聲泠然從此寐卽在此醒卽在彼孟時於宰
府索生金錢仍送作觀中旅費私詢何術笑而不言一日又詣
觀問殿上有女子驚聲出而微窺則一貧家女荆釵布裙而綠
髮垂肩翠眉欲滴貌勝於婉焚叩神座求仙方私詢女冠則云
觀東白氏女名石華父兄均歿孀孤以紡織爲生頃因母病來
祈神問字否曰未字籤落生抄方與之更尾之行女頻回顧意
若怒其價薄比至山村則老屋數椽門臨溪水紫藤花上纏枯
樹香雪四垂女入生詣屋後潛聽果聞老嫗呻吟聲心憐之明
日女又至持方欲行生趨問曰石娘阿母痊否女慘默無言搖
首遽去生潛詣村值女赴村市量藥生入視嫗臥繩榻氣嚱嚱
生詭云與母本葭莩頃自京都回不圖老人竟若是之憊嫗不

甚記憶惟吁喘道所苦生留金一笏置嫗床頭明日又往聞嫗
顫聲告女曰昨來一親串甚闕禮且擲一物置床頭兒試檢視
作何物渠再來當詳詢之也生入女急奔出璧其金曰何處郎
君頻來走動妾雖貧不是章臺柳昨留金在此豈欲炫桑中人
耶讀書人毋妄想也生曰小生實無他意幼失怙恃頃見卿母
如己母耳女聞之淚盈睫嫗在內問女與誰語女曰殆矣生哀
女乞暫云親戚女云妾尙不知郎姓能詭云親乎生因具告之
女入告母曰是卽昨來之李親家也嫗云問渠可是李十二秀
才之仲子耶生急趨應曰某誠是也曰多年失音訊矣一一問
家事生均含糊模稜以應臨行欲留金女堅不受生不敢強明
日女忽奔至值生午眠再三呼醒問卿何來泣曰是誠不能不
求救於假親戚矣問若何女惟哀急女冠代白之云里有無賴

瞰其孤時來挑逗女惟以刃自防頃揚言將乘母病劫之爲婚
生怒曰鼠子敢爾問名字策觀中白術詣邑告宰繫無賴於獄
宰生之同歲生也驚詢何來詭告訪友回觀女來伏謝繼泣云
母究因怒疾更劇奈何適孟至生代哀之孟曰先作巫醫再作
月老欣然往診投劑而愈數日霍然起能餐粥女仍坐紡生亦
不常至村然心終不釋一日女來告生曰郎之深情已篆肺腑
但宜遣媒往吾母無不允若狗偷鼠竊妾實羞爲之也生遂央
孟作冰更贅女家宰聞之具酒醴來賀生出孟連之資修葺房
舍購買女奴年餘石華生子極盛聲名曰夢生女問何意笑不
答久之歸漸洩於婉婉孟知之拂袖遽去杳無跡偶對婉擗頤
微情婉笑曰郎去休無累二娘盼也然心終疑爲夢幻不深信
後夢生漸長生日至村授兒讀嫗卒葬以禮夢生能文漸有聲

魯携見紫陽宰許爲國器宰旋卓異入都突遇生散值歸驚曰
君何時來耶詭應之及問人咸云渠終未嘗一日出都門劉究
以清刻獲罪朝士解侍御疏劾之十大款更得憲官實蹟再疏
則奉旨籍沒父子削職充雲南軍永不赦解頗聞紫陽宰語生
異事擬以妖惑連坐幸歐陽已位至春官極力保全卽荐授豫
之開封府尹厚贈以贖俾生與婉束裝荏開封住道出紫陽生
笑謂女曰與卿一訪夢中人可乎女笑諾旣而偵彼果有髮硃
觀并有是村遣僕訪之大驚而返告云村中亦有一李太守高
臥繡榻左僂僂耦右侍佳兒面貌姓名無一差舛生聞之亦駭
極色變幸女習典冊深知古本有離魂女子得毋相同遂自車
中抱持之曰耶無恐言已叱馭者進將到石華聞翠轡如雲倚
門窺瞰婉下車卽入門詣內視高臥者果然不認遂不及叙寒

喧逕偕婢扶生下車石見之欲號女急止之扶入緩緩推與床上人同臥覆以衾須臾聞生欠伸曰怪哉視之已合爲一體而汗面慘色如積疴之甫痊婉始代生詳述石亦驚幸非常石小婉一齡呼之以姊極爲友愛夢生忝見嫡母婉喜曰吾有子矣復何憂耶遂同之任爲夢生取歐陽之女珠纓爲婦親迎入都卽納粟入北闕夢生中式携婦歸一家歡忭生得二女內助頗多政聲年餘升粵之大方伯賀客滿堂忽司閤人報全真求見召入視之孟也再拜曰山野無狀是亦可以報君德乎然而戀棧之馬爲驚戀祿之官爲蠹戀俗之人爲蟬蟬急流勇退始免水翁覆轍言已索水一盂戟指咒良久持與生飲生覺心地空明一切泡幻與孟耳語又移時急上疏求解組夢生告婉母子同來勸止視石華獨含笑生更大笑須臾烟起於庭對面相失

比烟散則道士不見生與石華亦不見母子痛哭久之整宦橐
尙數千金同僑於紫陽舊宅年餘夢生又出仕於豫板興奉養
且生子女各二供嫡母含飴樂婉年四十有六忽小病見生突
立榻前曰吾與石華同隱仙山累卿岑寂未免不情今度卿爲
鬼仙無苦也夢生偕婦急入牽衣哀啼生曰兒做好官父心慰
矣孟道士遲爾父母於崑崙石室何能久待言已霹靂驟震屋
瓦欲飛視生頓杳婉在牀上亦含笑而逝玉柱雙垂

鬼神報施各別

浙之某村有富室端木伯仁者善營運阡陌之廣樓閣之麗黃
白之夥爲一鄉冠門下尤多食客皆代司會稽者也村西爲祠
山大帝廟向著靈顯本奉泥像里人媚之更於殿後築作寢宮
倩良工雕木肖大帝暨夫人行像以俾賽會時綵輿巡隴畝香

火若雲由廟達端木所居皆水田其路則羊腸一線曲逕甚幽
端木每於日下春時短衣芒屨經行田陌間觀稼穡之盛以爲
樂往往見一異人方頤廣顙衣冠甚都亦復負手眺望聽蛙鼓
噓聒輒撫掌稱快見其行逕知非村中人欲趨與語則倏忽不
見間見其詣廟中去詢廟祝亦罔知伊誰心異之未嘗也一日
自他村飲社酒回欹斜行陌上突與異人覩面兩肩相摩端木
富奴體本黃胖腰如五石瓠略擗以臂則骨冬一彈異人已失
足插田水中吉莫靴同爲泥沈心方惶恐意彼必施惡澤而異
人竟含笑不言自躍上岸帶水拖泥仍詣廟中夫端木歸不食
客兒孫語深以酒管自咎是夜廟祝夢大帝宣召舉泥靴與之
水漿泔泔亂滴未已間僧曰爾知吾靴何若是歟曰不知曰吾
每晚貪眺野色突於窄路上遇東鄰大財星端木官人兩面皆

汪洋無畔可讓正欲反奔拒渠乘醉與吾作惡戲乃擠墮至此
霑濡兩足實屬難堪汝當傳語渠但爲我換靴除不降殃反錫
以福區區一靴本不當較惟旣血食一方將此太不雅相耳僧
在夢中問渠旣慢侮大帝靈異何難治服一守財虜曰是何言
與凡大富大貴者運熾氣壯時頭上有文許紅光神人避道是
本我之懣懣與渠何尤焉僧尙欲有言聞夫人在幔內有聲罵
端木無禮帝急禁止遂互相交謫幾揮老拳僧一驚而寤耳際
猶若聞殿上有詬詈聲篝燈視之則神靴遞遞果如神言晨鐘
甫動卽趨叩端木之門問曰公昨夕曾擠一人墮水有之乎曰
是誠有之豈上剎寓公遣汝來責償耶曰非人乃大帝也屢告
夢中所見挈僧趨廟探視果然乃驚駭急購新靴爲大帝更新
焚香叩禱歉仄悚惶後誠無恙然得與門下客譚宴輒述此事

助談鋒以富炫奇其客有江姓者艷羨之且自入翁門已侵蝕
漸飽私橐潛以陶朱自期亦時行村落真有所遇一日夕照墮
崦嵫新月甫上江猶隴畔行其岸爲狹道道左爲極大深塘道
右爲極凹溝渠蒲葦叢茂適欲如廁而臆服殊甚卽循坡下草
中私焉忽聞遠遠有呵導聲心訝此際何能有官長潛視之呵
聲漸近前驅二人長二尺餘後有官人綉花紅袍圓翅烏紗帽
坐顯轎兩小人舁之行官人拈鬚微笑顧盼自雄江譴其爲鬼
大可效顰自下狂呼突起顛仆官人大衆全行墮入道左深塘
嗽嗽浮沉哀呼救命須臾濡首且沒頂矣江痴顧多時懼而潛
返緘口不言卽妻子前亦從未洩漏然由是每晚通村聞婦人
哀哭聲且泣且訴曰藥碯命薄甫差竣得大帝歡心銓授社公
乃正履新竟遭水厄耶郎爲社公死儻不得爲社母生煢煢孤

婦恨不殉藥砧也又聞數人若公役持徽纆沿村偵捕狀且行
且語曰冤哉若社役有一人活尙可知正犯茫茫海捕從何處
尋耶夜夜如是滔滔不絕者月餘始寂村人素敬畏大帝雖知
有異而不敢言恐其株連也時里有阮秀才字咸叔者館端木
家訓子平生讀關閩濂洛之書矩步方行不信詭譎每問翁言
及其事輒白眼爭桃燈作續無鬼論雜誦聲琅琅律載更倏
又三載端木偶與先生晚眺話桑麻江亦趨蹌陪侍其側翁偶
憶全事不覺笑出於口曰此卽當日不才擠神落水處也阮大
怒曰翁休矣若再嘵嘵僕寧作閉戶先生不願聽齊東野語卽
如大帝名載野史亦復學窮二酉力邁五丁化豕開山感鵲墮
鼓始得成神幾與夏禹熊力開轆轤二千餘里同一神蹟翁區
區田畯不過銅臭薰天但做措大豈尙欲傲神祇耶江聞之急

趨進曰先生可謂少所見而多所怪矣翁固從不虛言卽如僕亦曾親於東陌見神見鬼來遂縷述官人含笑拮髻狀兩鬼喝道狀被顛入水唧唧求援狀翁方解頤阮方氣結忽路旁草內有聲大呼曰咄三年前淹斃社公乃爾所爲耶我輩累敲扑久矣且同去嚙官司翁與阮只聞其聲而不見其形視江突變色目瞪口流沫矣扶歸則手足拘攣呼號終夜死

懷儂氏曰阮秀才續乃祖無鬼之論逮至報應昭昭始啞然而退固孰甚哉至汚靴者償靴斃命者抵命本無區別惟大帝之責富兒也語婉且平社公之追食客也律嚴而迫吾願世之鄉里小兒不自樹立依人爲命者切不可妄自效顰爲阮秀才所笑耳噫可懼哉

稽查天下五獄四瀆香火使

明季江西陸主政昉字秋坪妻秦氏字希玉因服官水曹贊某
循衛宅居之公懶於貨緣冷宦匏懸京華萍寄賴公擅畫夫人
工緇博饗殤焉時公年四十夫人三十尙無子遂好佛禪榻發
絲居然道伴每晚諷誦法華對坐蒲團譚妙諦忽二白髮叟掀
簾入衣冠甚都隨一垂髻女年約十六七風致嫺然掩口微笑
慙慙可掬驚問何來叟不答惟向上拜公與夫人都答拜拜已
命女叩謁如見父母禮夫人曳之起卽依依肘下秋波瑩瑩如
舊相識翁告坐女卽傍夫人坐乃拱手敬白曰僕通天狐也秋
槎路姓有所託遍矚人寰無誠篤如賢伉儷者幸勿以非類見
疑公驚駭察其古貌古心必有道者亦不深懼遂呼僮剪燈煮
茗遣婢掬果啖女然後問所託曰下界末劫鬼狐橫肆多有憑
依木石妄託神祇蠱惑愚昧冀攫香火此上帝所最痛惡以僕

尙梗直故降勅授爲稽查天下五獄四瀆香火使者賜斬妖劍
照見鏡準許便宜行事天符勒限起程遲則獲譴僕山荆已逝
遺一小妮子甚爲贅疣此女是也此去五年始煮旋雲路奔馳
携一弱息良非便也意託膝下俟僕回親謝祇領伏乞金諾公
唯唯曰託妻寄子古原有之惟翁旣仙人必有洞府何難爲女
公子謀一椽而乃委託凡人乎曰大凡上智者上達易下達亦
易道家最怕慾字一墮慾海百劫莫回僕幼不肖偶失足雖修
千餘年龍虎龜蛇認定道路水火調勻仍是地行仙不克莅九
重金闕此女最慧上智也若獨居恐蹈蔣家小妹覆轍僕方冀
若守真元後與麻姑藐姑射等共事或可携提老父公曰敬聞
命矣女公子穎慧絕倫愚夫婦又庸拙倘有疎虞奈何曰不難
袖出一玉界尺上鐫古篆文曰龍可鞭鳳可笞戒桃達警慾痴

功成返瑤池功敗墮泥犁宜凜之曰敬存尊處此女名慘翠兒
請視同康成婢供職役一刻不面卽拍玉呼慘翠兒始犯薄責
再犯痛責自受羈勒也公以爲難意猶豫而翁已告辭顧女曰
爾善事主人吾去矣挽之已杳聞雲際有鼓樂呵殿聲須臾寂
然回顧女已淪茗添香居然如願囑近夫人榻畔寢勿與兩婢
嘻而婢與僕婦多愛之女善解人意見夫人繡卽索花樣學拈
針見公畫卽代調顏色摹粉本均妙絕青出於藍後漸愛之如
女女繪事女工日有進益頗分勞售之尤速一夕偶不面試拍
玉呼之女卽喘奔伏地請死問何畏之深曰此鞭龍笞鳳之寶
一拍則心痛一擊則滅道十年夫人恐女竊藏之女笑曰奴實
不敢竊倘竊豈櫃櫥所能閉耶偶覩花徑碎石愛之携回十餘
塊極玲瓏者斧之零星搗藥和麵黏假山層巒疊嶂上瀑布下

流泉植小樹如松柏細草如藤羅浸於巨盎置佛几上作清供
公晚之巖角鐫小字如蟻文曰幻覺方歸公惟愛其慧俾留作
玩好而已偶聞燈燦喜曰明日有恩詔至次早卽先起潔庭除
焚香蠟以俟果有中貴策馬持節宣孔貴妃懿旨詔夫人夫人
朝服珠翠環珮方登車女乞隨行夫人以爲狐恐有變不許乃
潛伏夫人衣袖內小於拳輕如絮到宮門中貴止卽有嬪嬙引
入曲線數處遠一殿畫棟珠簾見貴妃衣淡黃袍貌端麗年約
廿餘夫人跪拜訖以錦墩賜坐并賜茶味極香美拜謝訖妃袖
出香囊示之曰聞出織指卿驗之眞耶視之果女所作迺婉奏
曰臣妾椎魯粗學挑弄竟不知上汚天目獲罪多矣曰卿針神
也薛夜來不能專美於前意屈卿住宮中年餘爲宮人輩教授
好否夫人錯愕不知所對女伏乳際以手指心心暴痛顏色慘

變乃俯奏曰妾薄命素有療疾頃正就醫不能日侍慈顏非何
可言如賜繡務乞齎至臣妾私第當陸續上呈妃曰既有清恙
不好勉強卽宣命護送回第後二日妃果來乞繡羅浮百蝶舞
衣女代成之呈進後忽覩佛香作篆曰明日恩詔至更美於前
已而果然蓋妃親繡衣甚喜憐夫人病賜與豐隆又囑妃父奏
公政績陞侍御俸盈位顯遂不須十指謀生活矣一夕公與夫
人坐庭中看月女親星隕如雨白毫貫銀河大詫曰紅羊赤馬
大劫將至奈何公問之不語使夫人窮詰之乃曰此定數也吾
父去四年餘屈指亦當返如父來二老哀祈之必能援閱兩月
翁果盛服車馬而至侍從如雲登堂并請夫人拜謝曰甫覆帝
旨卽來謁寒暄已致白玉蓮房一枚曰此玉海中產杵而服之
可延年又書一卷丹籙錦函曰此得之大明洞天皆不死訣也

已而見女喚女面曰小妮子曾詣宮闈否女笑應之曰險煞哉
幸宮門神將與乃父有素不然領斷矣言畢向公夫婦伏拜曰
賢伉儷信人也敢不泥謝公亦以情告拜求拯濟曰小妮子饒
舌觀盆山晚久之笑曰妮子亦大有情五年參養原當厚報然
需五日後方報命索玉界方斬不與翁卽笑而興辭五日後果
又來賀曰得之矣袖出黃金百兩與公曰請易白金以百金子
房主人以傭值償僕與媼凡日用所需如布帛菽菜油鹽等約
十年計者速購而儲於室事竣告吾女可爾公謹受教布席留
餐飲啖嚼甚豪遂又辭去問何之曰大忙大忙公卽如翁言房
主得巨金僕媼受傭值皆不知何故屆期女皇皇大經營月甫
上卽請公與夫人安寢聽鼙息始代下帷囑兩婢睡抱夫人所
愛狸奴臥婢側伏以衣視雞棲墀犬繫柱所儲一一加封誌佛

前剔燈燄搽香屑然後出酒肴啖僕媼啗痛飲酣臥先是女喜
晨眠刻獨早起比公與夫人醒女已華妝捧盤匱供盥櫛公出
拜佛飄經夫人視兩婢猶澁睡女從容進茶湯公更衣欲出造
謁呼僕駕車不應自往呼之甫下階視屋叢山突起靈霄漢山
花五色墮簷際宿鳥倦伏猶未醒呼夫人共視同詫絕携手出
廳事視僕與媼并襪被亦無惟空屋耳出門外則泉聲涓細老
樹參差石梁長數丈通山下怪石巉巖杳無人跡遠望大海接
天旭日如葢回視兩婢如痴雞犬狸奴什物所儲均在壁上畫
嶼亦無恙幽邃之景與盆山形勢無二欲尋女詢之杳矣居十
餘日始有樵人過橋下呼與語知爲幻覺方歸島隔大海南望
黑影如線登萊界也倏有野客數輩黃冠野服來訪詫曰君滿
面宦容何有此神通公以狐叟致此對曰此駱秋槎先生也何

曾是狐渠得道已久游戲人間詭託於狐耳出所授書示之曰此瑯環至寶秘笈也各乞錄一通而去并授以修煉之法曰君屋後有大嶺嶺後一圃中產奈棗如櫻桃大者採雜菽粟服之久卽辟穀否則十年後安有世俗糧耶公遂與夫人照書修持貌均如三十歲人兩婢亦長如十六七歲至我朝雍正三年有海客遇颶風巨浪如山掀簸海舶風黑若暝舟人倉猝號泣忽見一神人星冠鶴氅立雲際執玉界尺揮之風頓息引至一島始就泊衆拜謝之神問曰頃何朝代衆具以對神曰聖人在位蒼生有福衆拜求姓名曰吾明代陸主政也言畢飛去衆登島覽勝見屋宇廚竈井臼宛然皆化爲石屋後石壁鐫字自叙蹤跡如此後有好事者附海舶再訪之則如船近三山仙風引去可望不可卽矣

懷儂氏曰禍患之來滿身桎縛卽寥空之翔淵溪之躍且羨之
况明明爲拔宅飛仙耶陸主政然諾不欺遂得脫身天外信之
一字可忽乎哉噫范張之風於斯再見伯陽之後更有替人

妾薄命

妾薄命乃樂府題穎上秦司馬珍爲秦淮名妓王楚楚者賦也
楚楚本名家女家式微爲匪人誘賣入勾欄貌嫵媚端麗有閨
秀氣且工詩善畫有林下風聲價頗高名冠北里久之假母死
益自重所居灣腰柳畔水榭珠簾焚香煮茗遊船經樓下過聽
楚楚吟哦聲棹爲之停歌爲之遏三河明經傅君名華字秋野
藻詞華瞻裙屐年少秋試赴白門聞楚楚香名欲訪素自憐阮
橐不敢往同席白君名茨饒於資適以遺才煩傅捉刀思有以
媚之卽慫恿傅往曰經頭錦吾代子謀傅欣然皆往畫舫到門

而楚楚方着藕絲衫梳墮馬髻倚檻拈毫作水榭詞苦未就傳
入視箋上起句云東風揉碎小垂楊影落紅橋水尙香之卽代
爲續成曰底事灣腰常不起讓開明鏡照紅妝楚閱之大喜絮
絮問鄉貫白固識女者代答之且道傅繡幕懇切楚驚詢曰臺
城西畔方氏三姑姑號秋鵲詞人亦女學士頃因嫠而歸寧居
園中妾常觀慈暉吟韻是郎何人曰僕之從母也楚楚遂褰
衽拜曰慕公子雅望久矣得親芝顏快慰飢渴言已嚶嚶一聲
臨流開筵品味鮮新咄嗟立辦更命雛娃度曲自抽玉簫倚和
傳於此時心蕩神迷不知此身在人間天上矣夜闌始別更訂
後期明日往更示殷勤出手著金粉留香稿囑傳代酌稍稍成
就之便泠泠如絃上音楚楚益喜暗囑曰公子明夕視水榭懸連
環漏紗燈當舍白獨來妾有隱曲奉陳次夕瞰燈果獨往遂與

定情月餘榜發白售而傅竟落慚汗不面楚楚詣廨所慰之曰
以公子才華準步青雲其所以暫聽鵬翮者未嘗非老天玉成
其偉器耳何須啾唧還宜珍重吟躬砥礪素業妄自信相人不
謬惟公子鑒之平頭進纓金箱一事啓之內皆端溪珊瑚管涔寶
之屬自畫紈簾數種自繡扇囊魚袋各一更朱提二百兩曰以
此略助膏火且表戀悅耶其哂納傅見之破涕爲笑曰鬚眉男
子何智出裙釵下耶若再聞葺有如江水遂復開筵暢飲達旦
榜人催行傅話別有句云從今燈火蓬門底每憶卿卿不敢眠
楚和句有夢魂豈爲長江隔夜夜來聽郎讀書洒淚判袂問者
颺之曰高捷後僮僕車馬趾高氣揚偕同歲生宴於楚楚家欲
納妾意頗注楚涕泣辭乃軒渠曰若閱人多何愛彼腐白蠟渠
滿身寒骨將隨之噉糠粃耶時穎上秦君名珍者亦落第艱於

資斧不能歸重陽節猶衣一領含風葛與白有舊知遊所來訪
泣求資助語婉而哀白不答惟炒談已文云起落數處典貴華
胄的真元度乃僅置三十名外雖中猶屈糊眼主司真不了漢
言已長吟而曼歌之秦面赭勉加餐舉久之再道來意白嚙嚙
曰同在客中愛莫能助奈何庖人進魚羹白與客舉筋啖嚼亦
絕不問故人餒否楚楚不平曰君何太無香火情桑梓同學人
非浪打秋風者白大噉曰不圖小娘子專愛窮措大大奇言畢
倚案假寐微吟我醉欲眠句秦羞憤拂袖去將踰闥一雛婢呼
曰秦官人止步引至一小閣中極幽僻曰此娘子覓句處盍小
憩渠卽來頃捧肴酒至餐已進苦茗飲已進繭襖絮袍等件請
更敝者愧却之曰沈郎腰瘦一把矣尙禁得西風搜刮耶卒勸
而更之起視簾外新月挂樹飲者亦盡舫笙歌轟笑去見楚楚

淡妝含笑來遽曰爲俗客纏擾幾冷淡高人罪甚罪甚茗話清
譚殷殷聞訊秦自云家本赤貧歸亦無益然終不欲棄骸骨於
異域間知心有幾曰京都有友官樞曹最契合往投旣得啜飯
且可下北闌然迢迢十八站能乞食去耶楚曰妾已辦矣袖出
朱提二百持贈曰君貴人也此穢墟不敢屈留乞早登程鴻飛
有日卽命平頭籠燭送歸廐所次年傳喪耦意興蕭然適是秋
有恩科楚楚飛雨邀之往留住水榭凡起居餐眠以及矮屋所
需無不位置貼妥更代謀關節遂捷一切費用喜金皆出之楚
楚乃置酒爲賀極水陸之盛酒闌縱體入懷曰妾流落風塵終
非好結果然所以不卽嫁者因怕作小星否則往來豈少金龜
婿郎貴矣又謀絃續妾陋頗能操井臼且年來篋中尙富有斷
不致室對芙蓉而家徒壁立者傳曰小生不才賴卿始有今日

敢不如命但須禮闈一戰無論成敗當踐約楚楚慙慙曰恐南
宮捷後蔡中郎爲牛家女婿矣尙尋故劍乎傳誓以天日遂喜
翌晚肩輿同詣三姑申賀姑亦極贊其成歸而餞於桃葉渡笙
管嗷嘈互賡疊唱岸上觀者目爲神仙舂鴈酒闌楚楚舉卮勸
飲撥絃作歌歌曰桃葉渡瑟瑟生菰蒲秋風起水縈紆郎買棹
妾閉廬妾身飄泊如萍梗浪打風欺郎不忍江天高山月冷中
有嬋娟望郎影郎行去似風中蓬妾身化作石頭石郎若封侯
不肯歸丹楓林下鳴鳴泣歌已聲淚俱下傅抱持勸慰曰僕方
與卿共富貴何歌之慟也遂別明年傅果成進士泥金到門傅
所識諸名士咸載酒賀或呼爲嫂或呼爲夫人縣君楚楚盛治
壺觴檢衽拜曰妾有一言敢陳清聽妾陋質得秋野憐許侍巾
櫛若再於舞裙歌扇下討生活何以對秋野請自今以往閉桃

把白板門今日之聚卽與諸君子別耳衆聞之爭贊其賢淑知大體次晚往賀三姑伏拜曰婢子與大郎有成約姑所知也箇中變惟有一死三姑曰吾姪非薄倖郎何過慮且有老身證量不至作李十郎園例凡歌妓詣內堂無坐者至是命坐留膳略辭謝曰轉瞬卽吾家新婦何必辭立取金玉兩鳳頭釵贈之曰以此當玉臺楚楚喜極而悲謝而受之歸則閉門却掃私幸五花諧七香車不日可到門矣孰意人情乖變事出非常外間紛議傳散館授豫省太守回籍祭掃已與大姓論婚始不信繼更確憤極寄嬌女阿巧於假姨貨宅贖資求三姑手書將往三河面詰傳買舟携一婢一平頭北下抵揚州病舍舟登陸先遣平頭往探已則底逆旅服藥餌平頭回云傳已雙雙赴任矣楚楚聞之瞪目直視咯血盈唾孟哭無聲旋甦欲扶病往追平頭曰

陸行千餘里豈弱女子所能追及耶夜靜平頭盜銀篋遁釵釧首飾一空聞之病更劇檐月轉三更燈一點如豆遂自縊於後院馬槽上時有貴官自京都來以進士授河工司馬日於市上購爛銅碎玉奇珍異玩將過江報楚楚德伊何人秦君珍也忽聞後院喧鬧云有女子縊馬廐中奔睨之知爲楚楚急扶救已香魂一縷散矣詢雛婢猶舊識始悉顛末失聲大慟曰正圖報恩何意失之交臂楚楚死僕之過也裝以繡衣殮以文梓葬以吉壤薦以高僧其易簀也抱尸哭以頭觸樗具哭其送就窀穸也衰麻執杖前趨哭其輓經追薦也朝暮上香哭供茶供飯亦哭事竣費千金收雛婢爲妾以楚楚所携書畫玩具親送於阿巧又爲擇名家子嫁之若已女奩資豐富約又費千金履任過揚州重加封植環薛梅花手題墓碑曰巾幗知己薄命女子秦

淮王楚楚之墓繪感舊圖作妾薄命詩一時題者和者甚夥同人聞其事咸怒髮切齒詈傳秦曰此僕因循之過也於傳君何尤

懷儂氏曰人人讀紫釵記輒痛哭霍小玉今楚之情尤厚於玉也楚之死尤慘於玉也千餘金之持贈不得五花詰僅換得馬腕上三尺羅耳秦司馬若爲黃衫那得不手刃此儻然余則猶有說凡望之奢者酬轉薄與之厚者仇轉深風流俊達如康狀元尙倚劍著中山狼事豈僅露水司中幾個薄命妾哉願人當鼓吹朝陽綺羅滿座時急須冷下心來想想